

【擲牙齒】張旭英原作

堵好係換牙齒个七八歲，舊个牙齒𠵿𠵿𠵿，新牙就先暴出來，也就係人講个生豬哥牙啦，又恁堵好係頭前个當門牙，係講無先摺舊牙擲𠵿，一方面驚怕會影響新牙个生長，再方面細阿妹仔个門面就會𧏧到看毋得。

就恁樣，第二日吾爸渡佢坐巴士去街項齒科擲牙齒。還當記得愛去街項个前一暗晡吾姆遽遽用裁縫車踏踏啊，兩下半就做好一身完匹斯¹愛分佢著去街項擲牙齒。毋知係毋係著新衫心頭歡喜，對黏時愛擲牙齒个緊張，試著較毋會發痴驚²。去到先生該位，護理師先摺佢注痺藥，先生一抹煞³擲𠵿四支舊牙，護理師喊講棉花愛用力咬等，痺藥𠵿過，故所也無感覺著有幾痛。坐有一下仔，護理師講做得轉去哩！拿好藥包交待講係止痛藥，實在當痛痛到佇毋著⁴就愛拿來食，係講會試著毋爽快，就愛倒轉來分先生看。

¹ 完匹斯：音 van' pi sii'；外來客家語，連身洋裝。

² 發痴驚：音 bod' cií' giang'；受到驚嚇而心中感到害怕，甚至起雞皮疙瘩。

³ 一抹煞：音 id' mad' sad'；全部。

⁴ 佇毋著：音 du m' diau'；指身體或心理不能負荷或承受。

佢跔等吾爸个尸背尾，準備愛行去赴車枋⁵，欸！仰毋係行去車頭个方向？該時佢還無法度講話，用手拉吾爸衫腳提醒阿爸行毋著哩，指等車頭該片，吾爸笑微微仔講：「𠵿兩儕，先來去食一碗冰正去坐巴士」。包尾佢正知，食冰就係驚痺藥過𠵿開始會痛，吾爸知得棉花拿𠵿驚怕會出血，食冰暫時做得止血止痛。該碗冰係清冰，白雪雪个冰、淋一息仔烏糖水，該冰冰涼涼、甜甜个味緒佢永久記得。下後再點清冰來食，佢嘎尋毋著當時該種味緒。

擲𠵿四支牙齒个佢，跔等吾爸歡歡喜喜食冰，又安安心心坐等巴士轉屋下，毋知續下來還有愛面對个事情。第一，就係暫時做毋得食硬飯，淨做得食粥無就食麵；第二，少𠵿四支牙齒暫時變到當𧏧，會分人笑「缺牙耙」。仰結煞⁶正好呢？該時𠵿有嘴落仔⁷好落，高不將嘴恬恬莫講話，就毋會分人看著吾牙齒少𠵿四支，還有食粥無就食麵，驚怕愛食一駁仔⁸哩啲！

這下吾當門牙生到齊齊正正，除𠵿愛感謝吾爸个智慧，還有吾姆做一身新衫分佢，使致當少出門个細阿妹增加異多个勇氣，做得勇敢去面對擲牙齒个事情。

⁵ 赴車枋：音 fu ca' biong'；趕車。

⁶ 仰結煞：音 ngiong gad' sad'；怎麼辦；如何是好。

⁷ 嘴落仔：音 zoi lab' e'；口罩。

⁸ 一駁仔：音 id' bog' e'；一陣子。

【好空】徐子涵原作

人講，笑頭笑面个人較有人緣；佢講，會講客个細人仔較得人惜。係兩種加起來，就會變出當多好空个事情出來哦！

社區肚个老老嫩嫩，佢比吾姆還較熟事；社區肚个事情，乜比佢還較瞭解。成時攞兜仔菜、帶兜仔糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係搞个，所有好空个，通棚都係佢好嘴碼摺禮貌換來个。

對門九十六歲个伯婆太講，這下个細人仔，毋知係畏羞抑係搨屎，盡少像佢恁有笑容、恁會同人相借問个，故所特別惜佢，盡阿謔佢。佢輒輒會攞手喊佢過去，拿兜仔零嗒分佢食，佢講就佢正有恁好空。同佢講話，全全愛用客話講，佢正聽得識，佢想怕係因為恁樣，正無細人仔愛同佢講話。三條巷仔个細人仔，就單淨佢一儕做得同佢謔哆半點鐘久，無講花蓼哦！

莫看佢年紀還細，係自行車落鏈¹、輪仔同球仔無風，佢自家就有辦法，毋使花錢去尋人搨手整、搨手嘮風。係愛打羽毛球，

乜有大人同佢做伴搞，恁樣講，你就知吾个朋友有幾多、年齡層有幾闊哩！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢當笑面，會同人打嘴鼓，還會同人搨手。比將講搨手倒垃圾、拚資源回收个東西、講兜仔笑科分人笑、講兜仔令仔分佢兜揣、講兜仔生趣个事情分佢兜聽，就連老伯姆來賣菜，佢乜會搨手喊：「買菜哦～！愛買菜無呢？」微微末末，講都講毋得煞，吾个大人朋友就係恁樣從細交陪來个，連吾姆都當欽服。

對巷仔口左幹上去个有錢人家同公園起到當闊，新聞報導過後，就當多遊客來遠寮，漸漸仔乜有人來擺攤仔做生理。佢輒輒會行兼去，人客來就搨手，無人客就打嘴鼓，毋多知仔又熟事哩！異多遊客聽著佢講客，會因為試著當親切，就買加兜仔，你講，有生趣無？

佢從來就無想著面帶笑容摺講客會有麼个好空，毋過確實帶分佢異多好空！總講，就係一種當湛斗²个感覺。

¹ 落鏈：音 lau lien；鏈條脫落。

² 湛斗：音 zam deu`；美好、很好。